

ծառայած բոլոր խայտարդէտ ժողովուրդների :

Արարական մի պատմութիւն եմ յիշում .—

Բեդուինը իր սքանչելի նժոյգը հեծած, սլանում էր անապատով, երբ ցնցոտիների մէջ կորած, փոշոտ ու ուժասպառ մի ճամբորդ տեսաւ :

— Գթութիւն, կոչեց օտարական թշուառը ձիաւորին, վրկի՛ր ինձ, տե՛ս, երեկոն մօտ է, բնակութիւնը՝ հեռու. ոտքով հասնել չեմ կարող. ահա խաւարը կ'իջնի ու գազանները կը յօշոտեն ինձ. յանուն Ալլահի, օգնի՛ր ինձ :

— Ի՞նչ ես ուզում, — հարցրեց Բեդուինը :

— Թամբիդ ա՛ն ինձ, մրմնջաց օտարականը. գթա՛, ուժասպառ եմ ու քայլելու անկարող :

Բեդուինը կարեկցեց. վար իջաւ երիվարից, օգնեց ճամբորդին եւ նստեցրեց թամբին, եւ երբ պատրաստուեմ էր ինքն էլ հեծնել, օտարականը ասպանդակեց նժոյգը ու սլացաւ հեռու. Բեդուինը այժմ միայն գլխի ընկաւ, որ այս նենգ յափշտակիչը իր հակառակորդն է ծպտեալ, որ վաղուց հետէ աչք էր դրել իր նրժոյգին. ու նա բոլոր ուժով ձայն տուեց յետեւից :

— Է՛յ, յանուն Ալլահի կանգ առ մի վայրկեան, գէթ խօսքս լսիր :

Աւագակը կանգ առաւ :

Հասկացայ ո՞վ ես, ասաց Բեդուինը,

խօսք չունիմ, վարպետ եղար, պարտուած եմ. բայց յանուն այն բոլոր թշուառների, որոնք այսուհետեւ անապատում կը մնան եւ գազաններին կուլ կը դառնան, որովհետեւ նրանց այլեւս ոչ ոք չի հաւատայ — յանուն բոլոր անճարներին ու խեղճերին, որոնց առջեւից այսուհետեւ ձիաւորները կ'անցնին անգթօրէն՝ ե՛տ տուր ինձ իմ ձին :

Յափշտակիչը մնաց մտածկոտ. ապա ձին քշեց, առաջացաւ, տիրոջը յանձնեց, որպէսզի անապատում, հաւատը չի մեռնի . . .

Դաշնակիցները այս Բեդուինի առաքինութիւնը չունեցան :

Նրանք Հայաստանը զոհեցին քեմալիկներին. եւ հաւատն սպանեցին աշխարհում :

Պատիժը չուշացաւ :

Արինահեղ կռիւ է գրեթէ բոլոր գաղթավայրերում :

Անհնարին է խողխողուած արդարութեան վրայ բախտ կառուցանել :

Այստեղ է Հայաստանի զօրութիւնը :

Այստեղ է ե՛ւ քեմալիզմի կործանումը :

Զարհուրելի կը լինէր կեանքը, եթէ իւրաքանչիւր ոճիւր իր մէջ իսկ չի պարունակէր իր անխուսափելի հատուցումը :

Նիմեզիդան — դունատ ու անողորմ — դարերի հետ է ընթանում անխօս ու սպառնալի. նրա ոտնաձայնը ոչ ոք չի լսում, բայց նրա հարուածից ոչ ոք չի ազատուում :

